

ଜାକୁବଙ୍କ ପତ୍ର ଜାକୁବ ଲେକିରଇବା ଚିଠି ଏ ବଇର ବିସଇ ଜାନ୍‌ବାଟା

ଜାକୁବ୍ ବଇ ଜାକୁବ୍ ନାଉଁ ଡାକ୍‌ତେରଇବା ଗଟେକ୍ ଲକ୍ ଲେକିଆଟେ । ଦେକ୍‌ବାକେ ଗାଲେ ଏ ଜାକୁବ୍ ଜିସୁକିରିସ୍‌ଟର୍ ବାଇ ରଇଲା । ଜେ କି ଆଦିଅ ମଣ୍ଡଲିର୍ ଗଟେକ୍ ନେତା ରଇଲା ଆରି ଜିରୁସାଲମ୍ ସବାର ଗଟେକ୍ ମୋମର୍ ରଇଲା ପେରିଡ୍ ୧୫:୧୩ । ପେରିଡ୍ ପାଉଲ୍ ମିସା ଜାକୁବ୍‌କେ ମଣ୍ଡଲିର୍ ମୁଲ୍ ଡେଲି ବଲି ଡାକ୍‌ତେରଇଲା ଗାଲାତିୟ ୨:୯ ।

ଜାକୁବ୍ ବଇ ଜିସୁକିରିସ୍‌ଟ ଜନମ୍ ଅଇକରି ୫୦ ବରସ୍ ପଟେ ଲେକାଅଇଆଟେ ବଲି ପଣ୍ଡିଡ୍‌ମନ୍ ବିସ୍‌ବାସ୍ କର୍‌ବାଇ । ଜାକୁବ୍ ଜିରୁସାଲମ୍ ମଣ୍ଡଲିର୍ ନେତା ରଇଲା । ତେବର୍‌ପାଇ ସେ ଡେଇ ବାସାଅଇକରି ରଇଲାବେଲେ ସେ ଏ ବଇ ଲେକିରଇଲା । ଜାକୁବ୍ ବିନ୍ ବିନ୍ ଦେସେ ଚିନ୍‌ବିନ୍ ଅଇଜାଇରଇବା ବାର୍‌ଟା କୁଟୁମ୍‌କେ ତାର୍ ବଇଟାନେ ନିଜେ ଜାନାଇଅଇଆଟେ ୧:୧ ।

ଜାକୁବର୍ ଏ ବଇ ସବୁ ବିସ୍‌ବାସିମନ୍ ନିଜେ ବାଇବାର୍ ବିସଇ ଆଟେ । ମାତର୍ ଜାକୁବ୍ ବାର୍‌ଟା କୁଟୁମ୍ ବିସଇ ନେଇକରି ସିଦା ସିଦା ଜିଉଦି ବିସ୍‌ବାସିମନ୍‌କେ ଲେକ୍‌ଲାଆଟେ । କାଇକେବଇଲେ ଏ ବଇ ଚିନ୍‌ବିନ୍ ଅଇଜାଇରଇବା ପଡ୍‌ବା ଲକ୍‌ମନ୍‌କେ କେଟାଇବା ବିସଇରେ ଜାନାଇଲାଇନି ।

ଜାକୁବ୍ ବିସ୍‌ବାସ୍ ଆରି କରମର୍ ନିକ ମିସିରଇବା ବିସଇ ଜାନାଇଲାମି ଜେ, ସଡ୍ ବିସ୍‌ବାସ୍ କର୍‌ବା କରମ୍‌ଡେଇ ଜାନାପଡ୍‌ସି ୩:୧-୧୨ ।

ଦେକିଟାଇଁ କରି କାତା କଇବାକେ ମିସା ଜାଗ୍‌ରଡ୍ କରାଇଲାମି ।

ଏ ବଇ ବିଡ୍‌ରେ ରଇବାଟା

- ୧. ଜାକୁବ୍ ତାର୍ ଚିଠି ପଡ୍‌ବା ଲକ୍‌ମନ୍‌କେ ଜୁଆର୍ ଜାନାଇଆଟେ । ୧:୧
- ୨. ସେ ବିସ୍‌ବାସିମନ୍‌କେ ଦୁକ୍ ଅଇଲାବେଲେ ଡାଟ୍‌ସଙ୍ଗେ ରଇବାକେ ସାଆସ୍ ଦେଇଆଟେ । ୧:୨-୨୭

- ୩. କରମ୍ କରି କେନ୍ଦ୍ରାରି ବିସ୍‌ବାସ୍ ଦେକାଇ ଅଇସି, ସେ ବିସଇରେ କଇଆଚେ । ୨:୧-୨୭
- ୪. ବାକିଅ କେନ୍ଦ୍ରାରି ଅଦିକ୍ ବପୁ ଅଇସି, ସେଟା ସେ ଜାନାଇଆଚେ । ୩:୧-୧୨
- ୫. ଜାକୁବ୍ ପର୍ମେସରର୍ ଗିଆନ୍ ଜଗତର୍ ଗିଆନ୍ ଟାନେ ଅନି ବିନ୍ ଆଚେ ବଲି ଟିକି ନିକି ଜାନାଇଆଚେ । ୩:୧୩-୪:୧୦
- ୬. ପଚେ ସେ ପଡ଼ବା ଲକ୍‌ମନ୍‌କେ ବଡ଼ପନ୍ ନ ଅଇବାକେ ଜାଗରଡ଼ କରାଇଲାନି । ୪:୧୧-୫:୬
- ୭. ସାରାସାରି ଜାକୁବ୍, କେତେଟା ସାନ୍ ସାନ୍ ମାନ୍‌ବା ଆଦେସ୍ ଦେଇକରି ତାର୍ ଲେକା ସାରାଇଆଚେ । ୫:୭-୨୦

^୧ ✧ମୁଇ ଜାକୁବ ମାପୁରୁ ଜିସୁକିରିସ୍‌ଟ ଆରି ବାବା ପର୍ମେସରର୍ ଗଟେକ୍ ଗତିଦାଙ୍‌ଡା ।

ଗୁଲାଇ ଜଗତେ ଚିନ୍‌ଚତର୍ ଅଇଜାଇରଇବା ପର୍ମେସରର୍ ବାର୍‌ଟା କୁଟୁମର୍ ଲକ୍‌ମନ୍‌କେ ମୁଇ ଜୁଆର୍ ଜାନାଇକରି ଏ ଚିଟି ଲେକ୍‌ଲିନି ।

ବିସ୍‌ବାସ୍ ଆରି ଗିଆନ୍

^୨ ଏ ମର୍ ବାଇବଇନିମନ୍ ଜିବନ୍ ବିତାଇଲାବେଲେ ତମର୍ ବିସ୍‌ବାସ୍ ଡାଁଟ୍ ଆଚେ କି ନାଇ ବଲି, ଜେଡ଼କି ଦୁକ୍ କସ୍‌ଟର୍ ପରିକା ଆଇଲେ, ଏଟା ଗଟେକ୍ ନିକ କରମର୍ ବିସଇ ବଲି ଏତାଆ । ^୩ କାଇକେବଇଲେ, ଏନ୍ଦ୍ରାରି ଦୁକ୍ କସ୍‌ଟ୍ ଆଇଲେ ତମର୍ ବିସ୍‌ବାସ୍ ପରିକାକରି ଡାଁଟ୍ ଆଚେବଲି ଦେକାଇସି । ଆରି ମୁରଟ୍‌ବାଟା ଅଦିକ୍ ଅଦିକ୍ ଅଇସି ବଲି ତମେ ଜାନିଆଟାସ୍ । ^୪ ତମେ ସାରାସାରିଜାକ ମୁରଟିକରି ରଇଲେ, କାଇ ବିସଇଟାନେ ମିସା ଉନା ନ ଅଇକରି ପୁରାପୁରୁନ୍ ସିଦ୍ ଅଇସା । ^୫ ମାତର୍ ତମର୍ ବିଡ଼ରେ ଜଦି କାକେ ଗିଆନ୍ ଉନା ରଇ, ଗିଆନ୍ ପାଇବାର୍‌ଆଲେ ପର୍ମେସରକେ ମାଙ୍‌ମା । ସେ ତାର୍ ଆଡ଼ ମେଲାକରି, ଦସ୍ ନ ଦାରି ସବୁକେ ଦାନ୍ କରସି । ^୬ ମାତର୍ ସେ ଅଇସି କି ନ ଅଏ ବଲିକରି ନ ବାବି, ବିସ୍‌ବାସର୍ ସଙ୍ଗ୍ ପାର୍‌ତନା କର୍‌ବାର୍‌ଆଚେ । କାଇକେ ବଇଲେ ଜେ ଅଇସି କି ନ ଅଏ ବଲିକରି ବାସ୍‌ସି, ସେ ପବନ୍‌ସଙ୍ଗ୍ ଇଣ୍ଡିତେ ରଇବା ସମ୍‌ଦୁରର୍

✧ **୧:୧** ୧:୧ ମାଡିଉ ୧୩:୫୫; ମାର୍‌କ ୭:୩; ପେରିଡ଼ ୧୫:୧୩; ଗାଲାତିୟ ୧:୧୯

ଉଲ୍‌କା ପାନି ପାରା ଗଟେକ୍ ଲକ୍ । ୭ ସେ ରକାମ୍ ଲକ୍ ମାପୁରୁର୍ ଟାନେଅନି କାଜଟା ଆଲେ ପାଇବି ବଲିକରି ଆସା ନ କର । ୮ ସେ ତା, ଦୁଇମନିଆ ଲକ୍, ସେ କର୍ବା ସବୁ କାମ୍‌ଟାନେ ତବିର୍ ନ ରଏ ।

ସାଉକାର ଆରି ଅରକିଡ଼

୯ ଗଟେକ୍ କାକୁରତି ଅଇ ରଇବା ବିସ୍‌ବାସି ବାଇକେ ପର୍‌ମେସର୍ ସାଉକାର୍ କଲେ ସେ ସାର୍‌ଦା ଅ । ୧୦ ସେନ୍ତାରିସେ ଗଟେକ୍ ସାଉକାର୍ ବିସ୍‌ବାସିକେ ସେ ଅରକିଡ଼ କଲେ, ସେ ମିସା ସାର୍‌ଦା ଅ । କାଇକେବଇଲେ ସାଉକାର୍ ଲକ୍ ପଦାର୍ ଗାଁସର୍ ପୁଲ୍ ପାରା ଜାଉଁଲି ଜାଇସି । ୧୧ ଜେନ୍ତ୍ର କି ବେଲ୍ ଉଦିକରି ବେସି ତାତିକଲେ ଗାଁସ୍ ସୁକିଜାଇସି, ତାର୍ ପୁଲ୍ ଜଡ଼ିଜାଇସି ଆରି ତାର୍ ବାନିମୁରତି ନସି ଜାଇସି । ସେନ୍ତାରିସେ, ସାଉକାର୍ ଲକ୍‌ମନ୍ କାମ୍ କରି କରି ମରିଜିବାଇ ।

ପରିକା ଆରି ଦୁକ୍‌କସ୍‌ଟ

୧୨ ଜନ୍ ଲକ୍‌ମନ୍ ପରିକା ଆଇଲେ ମିସା ମୁରତି କରି ରଇବାଇ, ସେମନ୍ କେଡେକ୍ ନିକ କରମର୍ ଲକ୍ । କାଇକେବଇଲେ ସେ ସବୁ ପରିକାଇ ସେମନ୍ ଡାଁର୍ ସଙ୍ଘ୍ ଟିଆଅଇଲାପତେ, ପୁରୁସ୍‌କାର୍ ପାଇବାଇ । ପର୍‌ମେସର୍ ତାର୍ ନିଜର୍ ଲକ୍‌ମନ୍‌କେ ଜନ୍ ଜିବନର୍ ମୁକୁର୍ ଦେବାକେ ସପଡ଼ କଲାଆତେ, ସେମନ୍ ସେଟା ପୁରୁସ୍‌କାର୍ ଇସାବେ ମିଲାଇବାଇ । ୧୩ କାକେ ମିସା ଦୁକ୍‌କସ୍‌ଟ ପାଇବା ପରିକା ଆଇଲେ, ଏ ପରିକା ପର୍‌ମେସର୍ ପାଟାଇଆତେ ବଲିକରି କଇବାର୍ ନାଇ । କାଇକେବଇଲେ ପର୍‌ମେସର୍‌କେ କେ ମିସା ପରିକାକରି ନାପାରେ । ଆରି ସେ ନିଜେ କାକେ ପରିକା ନ କରେ । ୧୪ ମାତର୍ ଗଟେକ୍ ଲକ୍‌ର୍ କରାପ୍ ଗୁନ୍‌ଚଲନ୍ ତାକେ ପରିକା କରାଇ ଅଇବାକେ ଡାକିନେଇସି । ୧୫ ତାର୍‌ପତେ ତାର୍ କାରାପ୍ ଗୁନ୍‌ଚଲନେଅନି ପାପ୍ ବାରଇସି । ଆରି ପାପ୍ ଅଦିକ୍ ଅଦିକ୍ ବଡ଼ିଜାଇକରି ମରନ୍ ଆଇସି ।

୧୬ ଏ ମର୍ ଆଲାଦର୍ ବାଇବଇନିମନ୍, ତମେ ନାଡ଼ାଇଡ଼ଆ ନାଇ । ୧୭ ସବୁ ନିକ ଆରି ସିଦ୍ ରଇବା ଦାନ୍ ପର୍‌ମେସର୍ ଦେଲା ଆତେ । ବାଦ୍‌ଲେ ଉଜଲ୍ ଅଇବା ସବୁଜାକ ସେ ଡିଆର୍କଲା ଆତେ । ସେଟାମନ୍ ବାଦ୍‌ଲେ ବୁଲ୍‌ବାବେଲେ ବାଦ୍‌ଲୁସି ଆରି ଚାଇ ଏନେତେନେ ଅଇସି । ମାତର୍ ପର୍‌ମେସର୍ ଅଲପ୍ ମିସା ସେନ୍ତାରି ନ

କରେ । ୧୮ ତାର ସତ୍ତ୍ୱ ବାକିଅ ଆମ୍ଭଙ୍କେ ଜାନାଇକରି ତାର୍ତ୍ତେଇଅନି ଆମ୍ଭଙ୍କେ ଜିବନ୍ ଦେବାକେ ସେ ମନ୍ କଲା । ଜେଡକି ସବୁ ବିସଇ ସେ ତିଆରକଲା ମିସା ଆମେ ଅବ୍‌କା ତାର୍‌ପାଇସେ ଅଇବାକେ ସେ ମନ୍ କଲା ।

ସୁନ୍‌ବାଟା ଆରି କାମ୍ କର୍‌ବାଟା

୧୯ ଏ ମର୍ ଆଲାଦର୍ ବାଇବଇନିମନ୍, ମନେ ରକିରୁଆ । ତମେ ଆଗତୁ ନିକକରି ସୁନା । ମାତର୍ ବାବିଚିକ୍ତିକରି କାତା କୁଆ । ଦାପ୍‌ରେ ରିସା ଉଆନାଇ । ୨୦ କାଇକେବଇଲେ ମୁନ୍‌ସର୍ ରିସାର ଲାଗି ପର୍‌ମେସର୍ ସୁକଲ୍‌ସଙ୍ଗ୍ ଜଜ୍‌ନା କଲାଟା ନସିଜାଇସି । ୨୧ ସେଟାର୍ ପାଇ ତମର୍ ଚଲାଚଲ୍‌ତି ଟାନେଅନି ବାରଇବା ସବୁ ରକାମର୍ କାରାପ୍ ଅବିଆସ୍ ଚାଡିଦିଆସ୍ । ପର୍‌ମେସର୍‌କେ ନିଜର୍ ମନ୍ ସର୍‌ପି ଦିଆସ୍ । ତମର୍ ମନ୍ ବିଡ୍‌ରେ ସେ ଜନ୍ ବାକିଅ ରପିଆଚେ ସେଟାକେ ଦିଆନ୍ ଦିଆ । ସେ ବାକିଅ ତମ୍‌କେ ରକିଆ କର୍‌ସି ।

୨୨ ବାକିଅ ଜନ୍‌ଟା କରା ବଲି କଇଲାନି, ସେଟା କରା । ଅବ୍‌କା ସୁନିକରି ରଇବା ଲକ୍‌ମନର୍‌ପାରା ଉଆ ନାଇ । ଏନ୍ତାରିକଲେ ତମେ ନିଜେ ନାଡାଇ ଅଇଲାସିନି । ୨୩ ଜନ୍‌ଲକ୍ ପର୍‌ମେସର୍‌ର୍ ବାକିଅ ଅବ୍‌କା ସୁନ୍‌ସି, ମାତର୍ ତେଇର୍ କାତା ନ ନାମେ, ସେ ତାର୍ ମୁଏ ରଇବା ଆର୍‌ଲା, ଦର୍‌ପନେ ଦେକ୍‌ବା ଲକ୍ ପାରା । ୨୪ ସେ ନିକ କରି ନିଜର୍ ଚାଁଇ ଦେକି ଅଇତେରଇସି । ମାତର୍ ତେଇଅନି ଉଚିଗାଲା ପଚେ ତାର୍ ବାନିମୁର୍‌ତି ପାସରି ଜାଇସି । ୨୫ ମାତର୍ ମୁନ୍‌ସର୍ ମୁକ୍‌ତି ପାଇ ଗଟେକ୍ ପୁରାପୁରୁନ୍ ନିୟ୍‌ମ୍ ଆଚେ । ଜେ ସେ କାତା ସୁନିକରି ନ ପାସ୍‌ରେ, ଆରି ତାର୍‌ଲାଗି ସବୁ ମନ୍‌ପରାନ୍ ଦେଇକରି ନିଜର୍ ଜିବନ୍‌ତେଇ ମାନିକରି ରଇସି ବଇଲେ ପର୍‌ମେସର୍ ତାର୍ କରିରଇବା ସବୁ କାମ୍ ମଙ୍ଗଲ୍ କର୍‌ସି ।

୨୬ କେ ଜଦି ମୁଇ ନିଜେ ଗଟେକ୍ ଦରମ୍ ଲକ୍ ବଲି ବାବ୍‌ଲାନି, ସେ ଜଦି ତାର୍ ନିଜର୍ ଜିବ୍ ଜାଗରତା କରେ ନାଇ, ସେ ନିଜେ ଆକା ନାଡାଇ ଅଇଲାନି । ତାର୍ ରିତିନିତି କର୍‌ବାଟା ଚୁଟାଆଇସେ । ୨୭ ପର୍‌ମେସର୍ ଦେକ୍‌ବା ଇସାବେ ଜନ୍ ରିତିନିତି ସତ୍ ଆରି ନିକ, ସେଟା ଅଇଲାନି ଦୁକେ ରଇବା ଚୁଟାଚୁରି ପିଲାମନ୍ ଆରି

ରାଣ୍ଡିଜୁଣ୍ଡିମନର ଜତନ କରବାଟା । ପତେ ଜଗତର ଜଞ୍ଜାଲେଅନି ମୁକଲ୍‌ବାଟା, ଜେନ୍ତାରିକି ସେ ସବୁ ତାକେ ନ ନସାଏ ।

୨

ଲକ୍ ଦେକି କରବା କାମେ ଜାଗରତ୍

୧ ଏ ବାଇବଇନିମନ୍ ଆମର୍ ତାକ୍‌ପୁଟା ମାପରୁ ଜିସୁ କିରିସଟକେ ବିସ୍‌ବାସ୍ କଲାଋଲାଗି, ଲକ୍‌ମନର୍ ଅଲ୍‌ଗା ପିନ୍ଦାଅଡା ଦେକିକରି, ନିଜର୍ ଚଲାଚଲ୍‌ତି ବାଦ୍‌ଲାଇବାଟା ଟିକ୍ ନାଇ । ୨ ଜଦି ସବାଇ ଗଟେକ୍ ଲକ୍ ସୁନାର୍ ମୁନ୍ଦି ଆରି ଜକ୍‌ମକି ଜାଇତେରଇବା ବସତର୍ ପିନ୍ଦିକରି ତମର୍‌ଲଗେ ଆଇସି, ଆରି ଗଟେକ୍ ଲକ୍ ମୁରକି ରଇ ଚିରୁରୁଅଇରଇବା ବସତର୍ ପିନ୍ଦିକରି ଆଇସି । ୩ ଆରି ତମେ ସୁନ୍‌ମର୍ ବସତର୍ ପିନ୍ଦିଆସି ରଇବା ଲକ୍‌କେ ଅଦିକ୍ ସନ୍‌ମାନ୍ ଦେଇକରି କଇସା, “ଆସା ଏ ନିକ କୁରଟି ଉପରେ ବସା ।” ମାତର୍ ଅରକିତ୍ ଲକ୍‌କେ କଇସା “ତେଇ ଜାଇ ଚିଆ ଅ ।” ନଇଲେ “ତଲେ ବସ୍ ।” ବଲିକରି କଇସୁ । ୪ ସେନ୍ତାର୍ ଆଲେତା ତମେ ନିଜର୍ ନିଜର୍ ବିତ୍‌ରେ ବଡ୍‌ସାନ୍ ବଲିକରି ଅଲ୍‌ଗା ଇସାବେ ଦେକ୍‌ଲାସିନି । ଆରି କାରାପ୍ ଇସାବେ ମୁ ଦେକି, ବିଚାର୍ କଲାସିନି ।

୫ ଏ ମର୍ ଆଲାଦର୍ ମଇତର୍‌ମନ୍ ସୁନା, ପର୍‌ମେସର୍ ଏ ଜଗତର୍ ଅରକିତ୍ ଲକ୍‌ମନ୍କେ ବାଟି ଆତେ । ସେମନ୍ ତାକେ ବିସ୍‌ବାସ୍ କରବାଇ ଆରି ତାର୍ ରାଇଜେ କେଟ୍‌ବାଇ । ତାକେ ଆଲାଦ୍‌କର୍‌ବା ସବୁ ଲକ୍‌କେ ସେ ରାଇଜ୍ ଦେବିବଲି କାତା ଦେଏ ନାଇ କି ? ୬ ମାତର୍ ତମେ ଅରକିତ୍ ଲକ୍‌ମନ୍କେ ସନ୍‌ମାନ୍ ଦିଆସ୍ ନାଇ । ସାଉକାର୍ ଲକ୍‌ମନ୍କେ ତମକେ କସ୍‌ଟ ଦେଲାଇନି । ସେମନ୍‌ସେ ତମକେ ବିଚାର୍‌ନା ଜାଗାଇ ଜିକି ନେଲାଇନି । ୭ ତମକେ ଜନ୍ ନାଉଁ ଜିସୁ କିରିସଟ ଦିଆଅଇଆତେ, ସେ ନାଉଁ ନେଇକରି ନିନ୍ଦା କଲାଇନି ।

୮ ନିଜକେ ଆଲାଦ୍ କଲାପାରା ବିନ୍ ଲକ୍‌ମନ୍କେ ଆଲାଦ୍ କରା । ସାସତରେ ଲେକା ଅଇରଇଲାପାରା ପର୍‌ମେସରର୍ ରାଇଜର୍ ଏ ନିୟ୍‌ମ୍ ଜଦି ତମେ ମାନ୍‌ସା, ସେନ୍ତାର୍ ଆଲେ ଟିକ୍ କଲାସିନି । ୯ ମାତର୍ ତମେ ଜଦି ବଡ୍ ସାନ୍ ଦେକ୍‌ଲାସିନି, ପାପ୍ କଲାସିନି । ଆରି ସେ ରିତିନିତିର୍ ଲାଗି ଦସି ବଲାଇ ଅଇଲାସିନି । ୧୦ କାଇକେବଇଲେ ଜେ ମିସା ସବୁ ନିଅମ ମାନିକରି ଗଟେକ୍ ନିୟ୍‌ମ୍ ଚାଡ଼ିଦେଲେ,

କାଈ ନିୟମ୍ ନ ମାନିଲା ଲକର ପାରା ଦସିଅଇ ଡଣ୍ଡ ପାଇସା ।
 ୧୧ କାଈକେବଇଲେ ପରମେସର୍ କଇଲାଆତେ “ତମେ ବେସିଆ
 କାମ୍ କରୁବାରୁନାଇ, ଆରି ନର୍ ମାରୁବାରୁ ନାଇ” ବଲିକରି । ତେବେ
 ତମେ ଜଦି ବେସିଆ କାମ୍ ନ କରି, ଲକ୍ମନକେ ମାରସା, ତେବେ
 ତାରୁ ନିଅମ୍ ମାନାସ୍ ନାଇ । ୧୨ ପରମେସର୍ ବିଚାରୁନା କରସି ବଲି
 ଜାନିକରି ସେନ୍ତାରି କାତା କଇ କାମ୍ କରି ଦେକାଆ । ଜନ୍ ନିୟମ୍
 ଆମ୍‌କେ ମୁକ୍‌ଲାଇସି, ସେ ନିୟମ୍ ଇସାବେ ଆମ୍‌କେ ବିଚାରୁନା
 କରସି । ୧୩ କାଈକେବଇଲେ ଜନ୍‌ଲକ୍ ବିନ୍ ଲକ୍‌କେ ଦୟା ନ
 ଦେକାଏ, ପରମେସର୍ ବିଚାରୁନା କରୁବାବେଲେ ତାକେ ମିସା ଦୟା
 ନ ଦେକାଏ । ଜନ୍ ଲକ୍‌ମନ୍ ବିନ୍ ଲକ୍‌ମନ୍‌କେ ଦୟା କରିଆତେ,
 ସେମନ୍ ବିଚାରୁନାଟାନେ ଡରୁବାରୁ ନାଇ ।

ବିସ୍‌ବାସ୍ ଆରି କାମ୍

୧୪ ଏ ମର୍ ବାଇବଇନିମନ୍, ଜଦି ଗଟେକ୍ ଲକ୍ ମୁଇ ବିସ୍‌ବାସ୍
 କଲିନି ବଲି କଇସି । ମାତର୍ ତାରୁ କାମ୍ କଲାଟାନେ ସେଟା ନ ଡିସେ
 ବଇଲେ, ତାରୁ ପାଇ କାଈ ମୁଲିଅ ନାଇ । ଏନ୍ତାରି ବିସ୍‌ବାସ୍ ତାକେ
 କାଈ ମୁକ୍ତି ଦେଇ ନାପାରେ । ୧୫ ଜଦି ଗଟେକ୍ ବିସ୍‌ବାସି ବାଇ କି
 ବଇନିକେ, ସେ ଦିନର୍ ପାଇ କାଈବାକେ କି ପିନ୍‌ବାକେ ନ ରଇଲେ,
 ୧୬ ତମର୍ ବିତ୍‌ରେ କେଆଲେ ଗଟେକ୍ ଲକ୍ ତାରୁ ଲଗେ ଜାଇ, ତକେ
 ପେଟ୍‌କେ କାଦି ଆରି ଗାଗଡ୍‌କେ ଲୁଗା ମିଲ ବଲି କଇସା । ତମେ
 ତାକେ ଲଡାକେ ଲାଗୁବାଟା ନ ଦେଇ ଏନ୍ତାରି କଇଲେ କାଈ ଲାବ୍ ?
 ୧୭ ସେନ୍ତାରିସେ ଗଟେକ୍ ବିସ୍‌ବାସ୍ କରୁବା ଲକ୍ ତାରୁ ବିସ୍‌ବାସ୍ ସଙ୍ଗ୍
 ନିକ କାମ୍ ମିସା ନ ଡିସ୍‌ଲେ ତାରୁ ବିସ୍‌ବାସ୍ ମରିଗାଲା ଆତେ ।

୧୮ ମାତର୍ କେ ଆଲେ ମକେ କଇସି, ଗଟେକ୍ ଲକ୍ ବିସ୍‌ବାସ୍
 ଆତେ ଆରି ଗଟେକ୍ ଲକ୍ ନିକ କାମ୍ ଆତେ, ମୁଇ ତାକେ କଇବି
 ନିକ କାମ୍ ଚାଡି, ଗଟେକ୍ ଲକ୍‌କେ କେନ୍ତ୍ର ବିସ୍‌ବାସ୍ ଅଇସି ? ।
 ଅବ୍‌କା ବିସ୍‌ବାସ୍ କରୁତେରଇବା ଲକ୍ ରଇଲେ ମକେ ଦେକାଆ ।
 ମର୍ କରୁବା ନିକ କାମ୍ ସଙ୍ଗ୍ ମର୍ ବିସ୍‌ବାସ୍ ମୁଇ ଦେକାଇବି ।
 ୧୯ ପରମେସର୍ ଗଟେକ୍‌ସେ ଆତେବଲି ତମେ ବିସ୍‌ବାସ୍ କଲାସନି,
 ସେଟା ନିକ । ତୁମାମନ୍ ମିସା ସେନ୍ତାରି ବିସ୍‌ବାସ୍ କଲାଇନି ଆରି
 ଡରିକରି ଗଜ୍‌ଗଜି ଜିବାଇ । ୨୦ ମାତର୍ ଏ ନିଲ୍‌ଜାଇ ଲକ୍‌ମନ୍

ତମେ ବୁଝିନାପାରାସ୍, ଜଦି ଗଟେକ୍ ଲକ୍ ମୁଈ ବିସ୍ବାସ୍ କଲିନି, ବଲି କଇସି ଆରି ନିକ କାମ୍ ନ କରେ, ସେନ୍ତାର୍ଥାଲେ ତାର୍ ବିସ୍ବାସ୍ କରବାଟା ତୁଚାଇସେ । ୨୧ ଆମର୍ ପୁରବର୍ ଆନିଦାଦି ଅବ୍ରାଆମ୍ କେ ଦେକା, ପର୍ମେସର୍ ତାକେ ଦରମ୍ ଲକ୍ ବଲି ଡାକ୍ଲା । ସେଟା ତାର୍ ନିକ କାମ୍ ପାଇ । ଜେତେବେଲେ ନିଜର୍ ପିଲା ଇସାକ୍‌କେ ବେଦିଟାନେ ବଲି ଦେବାବେଲେ ନେଇରଇଲା । ୨୨ ତମେ ଦେକ୍ଲାସ୍‌ନିଜେ, ତାର୍ ବିସ୍ବାସ୍ ଆରି କରମ୍ ମିସିକରି ରଇଲା । ସେ କରିରଇବା କରମର୍ ଲାଗି ବିସ୍ବାସ୍ ସିଦ୍ ଅଇଲା । ୨୩ ଏଟାର୍ ଲାଗି ଦରମ୍ ସାସ୍ତରର୍ ଏ ବାକିଅ ପୁରାପୁରୁନ୍ ଅଇଲା । ଅବ୍ରାଆମ୍ ପର୍ମେସର୍‌କେ ବିସ୍ବାସ୍ କଲା । ତାର୍ ବିସ୍ବାସ୍ ଲାଗି ପର୍ମେସର୍ ଦେକ୍‌ବା ଇସାବେ ଦରମ୍ ଲକ୍ ବଲି ଏଜାଇଅଇଲା । ଆରି ଲକ୍‌ମନ୍ ତାକେ ପର୍ମେସର୍‌ର୍ ମଇତର୍ ବଲି ଡାକିରଇଲା । ୨୪ ଅବ୍‌ବା ବିସ୍ବାସ୍ କଲେସେ ଗଟେକ୍ ଲକ୍ ଦରମ୍ ବଲି ନାମାଇଅଇ ନସ୍, ମାତର୍ ତାର୍ କର୍‌ବା ନିକ କାମର୍ ଲାଗି ଅଇସି । ଏଟା ତମେ ଦେକ୍ଲାସ୍‌ନି ।

୨୫ ସେନ୍ତାରିସେ ବେସିଆ ମାଇଜି ରାଆବ୍‌କେ ମିସା ଅଇଲା । ସେ ଇସ୍ରାଏଲର୍ ଦେକାଦେକି କର୍‌ବା ଲକ୍‌ମନ୍‌କେ ଡାକିନେଲା ଆରି ବିନ୍ ବାଟେ ବାରଇଜିବାକେ ସାଇଜ କଲା । ସେ ଏନ୍ତାରି କଲାକେ ପର୍ମେସର୍ ଦେକ୍‌ବା ଇସାବେ ଗଟେକ୍ ଦରମ୍ ଲକ୍ ବଲି ଜାନାଇଅଇଲା ।

୨୬ ତେବେ, ଆଡ୍‌ମା ଚାଡିଗାଲେ ଲକ୍‌ମନ୍‌ର୍ ଗାଗଡ୍ ଜେନ୍ତିକି ମଲା ସମାନ୍, ସେନ୍ତାରିସେ ନିକ କାମ୍ ନ କଲେ, ବିସ୍ବାସ୍ ମିସା ମଲା ସମାନ୍ ଆଟେ ।

୩

ଜିବ୍‌କେ ବାନ୍ଧି ସଙ୍ଗାଇବାଟା

୧ ଏ ମର୍ ବାଇବଇନିମନ୍, ତମର୍ ବିତ୍‌ରେ ବାକିଅ ସିକିଆ ଦେବା ଗୁରୁ ଅଦିକ୍ ଉଆ ନାଇ । ଜନ୍‌ଲକ୍ ବିନ୍ ଲକ୍‌ମନ୍‌କେ ସିକାଇବାଇ ସେମନ୍ ଅଦିକ୍ ଡଣ୍ଡ ପାଇବାଇ, ଏଟା ଜାନିରୁଆ । ୨ ଆମେ ସବୁ ଡରକେତର୍ ବୁଲ୍ କଲୁନି । ମାତର୍ ଜେ ମିସା ତାର୍ କାତାବାର୍‌ତା କଇଲାବେଲେ ବୁଲ୍ ନ କରେ, ତେବେ ସେ ସିଦ୍ ଲକ୍ । ଆରି

ସେ ତାର ସବୁଜାକ ମିସା ଜାଗରତକରି ସଙ୍ଗଲ ଆଚେ । ୩ ଗଟେକ୍ ଗଡ଼ାର ବିସଇ ବାବିଦେକୁ । ଜଦି ଗଡ଼ା ଆମର୍ କାତା ମାନ୍‌ବାର୍ ଆଚେ ବଇଲେ, ତାର ଟଣ୍ଡେ ଲାଗନ୍ ଚାବାଇଲୁନି । ଜେନ୍ତାରିକି ଗଡ଼ାର ଗୁଲାଇ ଗାଗଡ଼ ମିସା ବୁଲାଇକରି, ଆମେ ଜନ୍‌ବାଟେ ମନ୍ କରୁ, ସେବାଟେ ନେଲୁନି । ୪ ସେନ୍ତାରିସେ ଗଟେକ୍ ବଡ଼ ପାନିଜାଜର୍ ବିସଇ ଚିନ୍ତା କରିଦେକା । ସେଟା ବେସି ବଡ଼ ରଇଲେ ମିସା ଜବର୍ ପବନ୍ ଆଇତେରଇଲେସେ ସେଟା ଚାଲାଇଅଇସି । ମାତର୍ ଗଟେକ୍ ଜାଜଚାଲାଉ ସାନ୍‌ଟା ବୁଲାଇବା ଚକା ମାରିକରି ସେ ଜନ୍ତି ମନ୍ କରସି, ଜାଜ ସେ ବାଟେ ଚାଲାଇ ନେଇସି । ୫ ସେ ରକାମ୍ ଆକା ଆମର୍ ଟଣ୍ଡେ ରଇବା ଜିବ୍ ମିସା ଆମର୍ ଗାଗଡ଼ର୍ ଗଟେକ୍ ସାନ୍ ଜିନିସ୍, ମାତର୍ ଏଟା ବେସି ବଡ଼ବଡ଼ କାତା କଇସି ।

ଗଟେକ୍ ଡଙ୍ଗରର୍ ବିସଇ ବାବିଦେକା, ସେଟା ବଡେଟା ରଇଲେ ମିସା କଣ୍ଡେକ୍ ଜଇ ଇଙ୍ଗ୍ରା ଲାଗିକରି ସବୁ ପଡ଼ାଇଦେଇସି ।

୬ ସେନ୍ତାରି ଜିବ୍ ମିସା ଜଇପାରା, ଜିବ୍ ବିଡ଼ରେ ମିଟ୍‌ଟାମନ୍ ବରଡ଼ିଅଇ ଆଚେ । ସେଟା ଆମର୍ ଗାଗଡ଼ ବିଡ଼ରେ ବାସାଅଇ ଆଚେ । ଆମର୍ ଗୁଲାଇ ଗାଗଡ଼କେ କାରାପ୍ ଡାବିଦେଇସି । ଆମର୍ ଜିବନ୍ ଜଇଟାନେ ପଡ଼ାଇଲାପାରା ପଡ଼ାଇ ଦେଇସି । ଆରି ସେ ଜଇ ନରକେଅନି ଆଇସି ।

୭ କାଇକେବଇଲେ ସବୁ ରକାମର୍ ଡଙ୍ଗରର୍ ଜିଡ଼୍, ଉଡ଼ିବୁଲ୍‌ବାଟାମନ୍, ରାଙ୍ଗିବୁଲ୍‌ବାଟାମନ୍ ଆରି ପାନିତେଇ ରଇବାଟାମନ୍, ପୁରବେଅନି ଲକ୍‌ମନ୍ ସେଟାମନ୍‌କେ ମାନାଇକରି ଆଚଡ଼ । ୮ ମାତର୍ ଏବେଜାକ ଜିବ୍‌କେ କେ ମିସା ମାନାଅଡ଼ ନାଇ । ତେଇ କାରାପ୍ ବିସଇ ପୁରୁନ୍ ଅଇଆଚେ । ସେ ତାର ନିଜର୍ ମନ୍ କରବା ଇସାବେ ଜାଇସି । ଆରି ମରନ୍ ଡାକିଆନ୍‌ବା ବିସ୍ ବରଡ଼ି ଅଇଆଚେ । ୯ ଆମେ ଜିବ୍ ସଙ୍ଗ୍ ମାପରୁକେ ଆରି ବାବା ପରମେସର୍‌କେ ଦନିଅବାଦ୍ ଦେଲୁନି ଆରି ଏ ଜିବ୍‌ସଙ୍ଗ୍ ପରମେସର୍ ତାରପାରା ତିଆର୍ କରିରଇବା ମୁନୁସ୍‌କେ ସାଇପ୍ ଦେଲୁନି । ୧୦ ଗଟେକ୍ ଟଣ୍ଡେଅନିସେ ଦନିଅବାଦ୍ ଦେବାଟା ଆରି ସାଇପ୍ ଦେବାଟା ବାରଇସି । ମର୍ ବାଇବଇନିମନ୍, ଏନ୍ତାରି ଅଇବାଟା ଟିକ୍ ନର୍ । ୧୧ ଗଟେକ୍ ବୁଆବିଲେଅନି, ଗଲାପାନି ଆରି ନିର୍‌ମଲ୍‌ପାନି

ବାରଇସି କି ? ନାଇ, ନ ବାରଏ । ୧୨ ଏ ମର ବାଇବଇନିମନ୍, ତୁମ୍ଭରିଗତେ ଜିତ୍‌ପଲ୍ ନ ପଲେ କି କାଇ ଅଞ୍ଜୁର୍ ମାଲେ ତୁମ୍ଭରି ନ ପଲେ । ସେନ୍ତାରିସେ ଗଟେକ୍ ଗଲାପାନି ବାରଇବା ତୁଆଇ ଅନି ନିର୍ମଲ୍ ପାନି ନ ବାରଏ ।

ସରଗର୍ ଗିଆନ୍

୧୩ ତମର୍ ବିତ୍‌ରେ ଗିଆନି ଆରି ବୁଲ୍‌ଟିକ୍ ବଲି କଇବା ଲକ୍ ଆଚଡ୍ କି ? ତାର୍ ନିକକରି ଜିଇବାକାଇବାଟାନେଅନି ସେଟା ଦେକାଅ । ତାର୍ ଜିବନେ, ଗଟେକ୍ ଗିଆନ୍ ରଇବା ଲକର୍ ଇସାବେ, ସବୁବିସଇ ସୁଆଲେ କଲାଆଚେ ବଲି ଦେକାଅ । ୧୪ ଜଦି ତମର୍ ମନ୍‌ବିତ୍‌ରେ ଈସାତଲା, କପ୍‌ଦାର୍‌ବାଟା ଆରି ସବୁବେଲେ ନିଜର୍ ବିସଇ ଚିନ୍ତା କର୍‌ବାଟା ରଇସି, ସେନ୍ତାରିଆଲେ ସେ ବିସଇଟାନେ ବଡ୍‌ପନ୍ ଉଆନାଇ । ଆରି ସଡ୍ ବିସଇ ବୁଲ୍ ଆଚେବଲି କୁଆ ନାଇ । ୧୫ ଏନ୍ତାରି ଗିଆନ୍ ପର୍‌ମେସରର୍ ଟାନେଅନି ନ ଆସେ । ସେଟା ଜଗତେଅନି ଆଇସି । ପର୍‌ମେସରର୍ ଆଡ୍‌ମା ନ ରଇବାଟାନେ ଅନି ଆଇସି । ଆରି ସେଟା ସଇତାନର୍ ଗିଆନେ ଅନି ଆଇସି । ୧୬ ଜନ୍ ଜାଗାଇ ଲକ୍‌ମନ୍‌ର ବିତ୍‌ରେ ଈସା, ଆରି ନିଜର ବିସଇସେ ଚିନ୍ତା କର୍‌ବାଟା ରଇଲେ, ସେ ଜାଗାଇ ଲାଗାଲାଗି ଆରି ସବୁ ରକାମର୍ କାରାପ୍ କାମ୍ ରଇସି । ୧୭ ମାତର୍ ପର୍‌ମେସର୍ ସିକାଇବା ଗିଆନ୍ ଜନ୍‌ଲକ୍‌ମନ୍‌କେ ଆଚେ, ତାକର୍ ଗୁନ୍‌ଚଲନେ ସେମନ୍ ସୁକଲ୍ ଅଇରଇବାଇ, ସାନ୍ତିସଙ୍ଗ୍ ରଇବାଇ, ସୁଆଲେ ରଇବାଇ, ଦୟା ଦେକାଇବାଇ, ଜିବନ୍‌ଦୁକାଇବାଇ ଆରି ତାକର୍ ସବୁ କାମ୍ ନିକ ରଇସି । ସେମନ୍ ଲକ୍‌ମନ୍‌କେ ବଡ୍ ସାନ୍ ଇସାବେ ନ ଦେକଡ୍ ଆରି ଚଲାନିକାତା ନ କଅଡ୍ । ୧୮ ଜନ୍ ଲକ୍‌ମନ୍ ସାନ୍ତିର୍‌ପାଇ କାମ୍ କର୍‌ବାଇ, ସାନ୍ତି ସଙ୍ଗ୍ ରଇକରି ଦରମର୍ ବିଅନ୍ ବୁନ୍‌ବାଇ, ସେନ୍ତାରି ଲକ୍‌ମନ୍ ପର୍‌ମେସର୍ ଦେକ୍‌ବା ଇସାବେ, ନିକ କାମ୍ ଦାନ୍ କାଟ୍‌ବାଇ ।



ଜଗତର୍ ସଙ୍ଗ୍ ମଇତର୍

୧ ତମର ବିତ୍ତରେ ମାରାମାରି ଆରି ଲାଗାଜତା କାଇକେ ଆଇଲାନି ? ତମର ମନବିତ୍ତରେ ଡ଼ିରଇବା କାରାପ୍ ମନକଲ୍ଲାଟା ଉଟିକରି ତମର ବିତ୍ତରେ ଢୁଙ୍ଗଲାନି, ଏଟାର ଲାଗି ଏନ୍ତାରି ଅଇଲାନି । ସେଟାରପାଇ ଗଟେକ୍ ଲକ୍ ଆରିଗଟେକ୍ ଲକର୍ ସଙ୍ଗ୍ ଲାଗଲ୍ଲାସ୍ତି । ୨ କାଇକେବଇଲେ ତମେ ଜନ୍ତା ମିଲାଇବାକେ ମନ୍ କଲ୍ଲାସ୍ତି, ସେଟା ମିଲାଇ ନାପାରଲେ, ମରାଇବାକେ ମନକଲ୍ଲାସ୍ତି । ଜନ୍ତା ମିଲାଇବାକେ ବେସି ମନ୍ ଅଇଲାନି, ସେଟା ମିଲାଇବାକେ ତମକେ ବପୁନାଇ । ସେଟାରପାଇ ତମରତମର ବିତ୍ତରେ ଲାଗାଜତା ଅଇ ମାରାମାରି ଅଇଲ୍ଲାସ୍ତି । ତମେ ପର୍ତ୍ତମେସରକେ ମାଙ୍ଗ୍ ନାଇଜେ ମନକଲ୍ଲାଟା ମିଲାଇ ନା ପାରଲ୍ଲାସ୍ତି । ୩ ତମେ ମାଙ୍ଗ୍ତେରଇସା, ମାତର୍ ସେ ତମକେ ଦେଏ ନାଇ । କାଇକେବଇଲେ ସେଟା କାରାପ୍ କର୍ବାକେ ମାଙ୍ଗ୍ଲ୍ଲାସ୍ତି । ସୁକେ ରଇକରି ସାଇସାରଦା ସଙ୍ଗ୍ ରଇବୁ ବଲି ମାଙ୍ଗ୍ଲ୍ଲାସ୍ତି । ୪ ଏ ବିସ୍ବାସେ ବିସ୍ବଦେବା ଲକ୍ମନ୍, ତମେ କାଇ ନାଜାନାସ୍ କି ଜଗତକେ ଆଲାଦ୍ କରୁମନ୍ ପର୍ତ୍ତମେସରର୍ ସତ୍ତୁ ବଲିକରି ? ଜନ୍ଲକ୍ ଏ ଜଗତର୍ ଚଲାଚଲ୍ଲତି ଆଲାଦ୍ କର୍ବାଇ ସେମନ୍ ପର୍ତ୍ତମେସରର୍ ବିରଦି । ୫ ତମେ ଦରମ୍ ସାସତରେ ଲେକାଅଇରଇବା ଏ ବାକିଅ ରୁଟାଇ ବଲିକରି ବାବ୍ଲ୍ଲାସ୍ତି କି ? ପର୍ତ୍ତମେସର୍ ଜନ୍ ଆତ୍ମାକେ ଆମର୍ ବିତ୍ତରେ ବାସାଅଇରଇବାକେ ଦେଲାଆତେ, ସେ ଆମ୍କେ ପୁରୁପୁରୁନ୍ ଅଦିକାର୍ କର୍ବାକେ ମନ୍ କଲ୍ଲାନି । ୬ ମାତର୍ ପର୍ତ୍ତମେସର୍ ଜିବନ୍ ଦୁକାଇଲ୍ଲାଟା, ତାର୍ତେଇଅନି ଅଦିକ୍ ବପୁଆତେ । ସେଟାରପାଇ ସାସତର୍ କଇଲାନି, ଆଁକ୍ରିଆମନ୍କେ ପର୍ତ୍ତମେସର୍ ବିରଦ୍ କର୍ସି, ମାତର୍ ସୁଆଲେ ରଇବା ଲକ୍କେ ତାର୍ ଜିବନ୍ ଦୁକାଇ, ଦୟା କର୍ସି ।

୭ ତେବର୍ ପାଇ, ତମେ ପର୍ତ୍ତମେସରକେ ସର୍ପାଇଉଆ । ସଇତାନ୍କେ ଜାକି ଦିଆସ୍ । ସେନ୍ତାରି କଲେ ସଇତାନ୍ ତମରଲଗେ ଅନି ପାଲାଇସି । ୮ ପର୍ତ୍ତମେସରର୍ ଲଗେ ଆସା, ତେବେ ସେ ମିସା ତମର ଲଗେ ଲଗେ ରଇସି । ଏ ପାପିମନ୍, କାରାପ୍ କାମକର୍ବାଟା ଚାଡିଦିଆସ୍ । ଆରି ଏ ଦୁଇବାଟେ ମନକରୁମନ୍ ତମର ମନ୍ ନିର୍ମଲ୍ କରା । ୯ ତମର ପାପରଲାଗି ମାରିଚପି ଅଇକରି କାନ୍ଦ୍ତେରୁଆ । ନ ଆଁସିକରି କାନ୍ଦ୍ତେରୁଆ, ସାରଦା ନ ଅଇକରି ଦୁକେ ରୁଆ

। ୧୦ ମାପରୁର ମୁଆଟେ ନିଜେ ନିଜେ ସର୍ପିତା, ସେ ତମ୍ଭେ ଉଟାଇସି ।

ବିନ୍‌ଲକର ବିଚାର କରାନାଇ

୧୧ ଏ ମର ବାଇବଇନିମନ୍, ନିଜର ନିଜର ବିତ୍ତରେ କୁଟ୍ କାତା କୁଆ ନାଇ । ଜଦି ବିସ୍‌ବାସି ବାଇମନର ବିରୁଦ୍ଧେ କୁଟ୍ କାତା କଇ ତାକେ ଦସ୍ ଦେଇସା, ତମେ ପରମେସରର ନିୟମ୍ ବିରୁଦ୍ଧେ କାତା ଅଇଲାସିନି । ଆରି ତାର ନିୟମ୍‌କେ ବିଚାର କଲାସିନି । ପରମେସରର ନିୟମ୍ ବିଚାର କଲେ, ତମେ ତାର ଆଦେସ୍ ମାନାସ୍ ନାଇ । ମାତର ବିଚାରକାରିଆ ଇସାବେ ରଇଲାସିନି । ୧୨ ପରମେସରସେ ନିୟମ୍ ଦେଇପାରସି । ସେ ସେ ଆମ୍ଭେକେ ବିଚାର କରିପାରସି । ସେ ସେ ଲକ୍‌ମନକେ ରକିଆ କରିପାରସି ଆରି ସେ ସେ କୁରୁପ୍‌ନାସ୍ କରିପାରସି । ମାତର ତମେ କେ ଜେ, ବିନ୍‌ଲକର ବିଚାର କରିପାରାସ୍ ?

ବଡ଼ପନ୍ ବିସଇର ଚେଡ଼ନା

୧୩ ତେବେ ମର କାତା ସୁନା । ତମର ବିତ୍ତରେ ଜନ୍ ଲକ୍‌ମନ୍ ଏନ୍ତାରି କାତା ଅଇତେରଇସା, ଆଜି ନଇଲେ କାଲିକେ ଆମେ ଏ ନଅରେ କି ସେ ନଅରେ ଜିବୁ, ତେଇ ବରସେକ୍ ରଇବୁ ଆରି ବେବାର୍ କରି ତାରୁ ଅରଜୁ । ୧୪ ମାତର କାଲିକେ କାଇଟା ଗର୍ସି, ସେଟା ତମେତା ନାଜାନାସ୍ ! ତମର ଜିବନ୍ ଦୁର୍ଭରି ସମାନ୍, ଜନ୍‌ଟାକି ଚନେକର୍ ପାଇ ଡିସି ଆରି ମାୟା ଅଇଜାଇସି । ୧୫ ତାର ବାଦୁଲେ ତମେ ମାପରୁ ମନ୍ କଲେ ଆମେ ଜିଇକରି ଏନ୍ତାରି ନଇଲେ ସେନ୍ତାରି କରୁ ବଲି କଇବାର୍ ଆତେ । ୧୬ ମାତର ତମେ ସେନ୍ତାରି କରାସ୍ ନାଇ । ଆକ୍‌ରିଆମନ୍ ଆରି ବଡ଼ପନ୍ କାତା କର୍ତ୍ତମନ୍ । ଏନ୍ତାରି ବଡ଼ପନ୍ କାତା କଇବାଟା ବୁଲୁଆତେ ।

୧୭ ଏତାଇ ରୁଆ । ଜେ ଜଦି ଏଟା ନିକ କାମ୍ ବଲି ଜାନେ, ମାତର ସେଟା ନ କରେ ବଇଲେ, ପରମେସର ଦେକ୍‌ବା ଇସାବେ ସେ ଦସ୍ କଲାଆତେ ।



ସାଉକାର ମନ୍‌କେ ଜାଗରତ୍ କରାଇବାଟା

^୧ ଏ ସାଉକାର ଲକ୍ମନ୍, ମରକାତା ସୁନା । ତମ୍ଭେ ଜନ୍ ଦୁକ୍‌କସ୍ତ ଆଇଲାନି, ସେଟାର ପାଇ ମାରିତପିଅଇ କାନ୍ଦା ।
^୨ * ତମ୍ଭେ ଦନ୍‌ସ୍‌ପତି କୁଇଗାଲାନି ଆରି ନିକନିକ ବସ୍ତତ୍‌ମନ୍ ଅଲ୍‌ମା କାଇଲାନି ।^୩ ତମ୍ଭେ ସୁନାରୁପା ଚିଲମ୍ ଦାରଲାନି ଆରି ଏ ଚିଲମ୍ ଦାରଲାଟାକେ ନେଇକରି ପର୍‌ମେସର୍ ତମ୍ଭେ ଦସି କର୍‌ସି । ଆରି ଜଇଟାନେ ପଡ଼ଲେ ଜେନ୍ତି ଗାଗଡ଼ ନସି, ସେନ୍ତି ତମ୍ଭେ ଗାଗଡ଼ ସେ କୁରୁପ୍‌ନାସ୍ କର୍‌ସି । ଏ ଜୁଗ୍ ସାରବାକେ ଜାଇତେରଇଲେ ମିସା ତମ୍ଭେ ସବୁଲକ୍ ଦନ୍‌ସ୍‌ପତି ଚୁଲିଆଇଲାସିନି ।^୪ ତମ୍ଭେ ଜମିବାତିଲଗେ କାମକର୍‌ବା ବୁତିଆର୍‌ମନ୍‌କେ ବୁତି ଦିଆସ୍ ନାଇ । ତାର ବାଦୁଲେ ସେମନ୍‌କେ ନାଡ଼ାଇ ଆଟାସ୍ । ସୁନା, ସେମନ୍‌ର୍ ବୁତି ତମ୍ଭେ ବିରୁଦେ କାନ୍‌ଲପାରା ସୁନିଅଇଲାନି । ସେମନ୍‌ର୍ କାନ୍‌ବାଟା ସବୁର୍‌ଟାନେଅନି ବପୁ ରଇବା ମାପୁରୁ, ସୁନ୍‌ଲା ଆତେ ।^୫ ଏ ଜଗତେ ତମ୍ଭେ ସାଇସାରଦା ସଙ୍ଗ୍ ଜିଇଲାସିନି । ଜାଇଟା ମନ୍ କଲେ, ସେଟା କଲାସିନି । ମାତର୍ ପର୍‌ମେସର୍‌ର୍ ଡଣ୍ଡର୍ ଦିନ୍ ଦାପ୍‌ରେ ଆଇଲାନି ।^୬ ତମ୍ଭେ ଦସ୍ ନ କଲା ଲକ୍‌ମନ୍‌କେ ଦସି ବଲିକରି ମାରି ମରାଇଆଟାସ୍ । ଏଲେମିସା ସେମନ୍ ତମ୍ଭେ ଅଟକାଅଡ଼ ନାଇ ।

ସାଆସ୍ ଦାରିକରି ପାର୍‌ତନା କରା

^୭ ଏ ମର୍ ବାଇବଇନିମନ୍, ମାପୁରୁ ଆରିତରେକ୍ ଆଇବାଜାକ ମୁର୍‌ଚିକରି ରୁଆ । ଚାସିମନ୍‌ର୍ ବିସଇ ଚିନ୍ତାକରିଦେକା, ତାକର୍ ଜମିଅନି ନିକ ପସଲ୍ ମିଲ୍‌ବା ଜାକ ସେମନ୍ ଜାଗିକରି ରଇବାଇ । ଜେନ୍ତିକି ମାଟିବିଜାଇବାକେ ପର୍‌ଡୁମର୍ ବରିସା ଆରି ନିଙ୍ଗ୍‌ପାପାଟ୍‌ବା ବେଲର୍ ସାରାସାରି ବର୍‌ସାକେ ମୁର୍‌ଚିକରି ଜାଗି ରଇବାଇ ।^୮ ସେ ରକାମ୍ ତମ୍ଭେମନ୍ ମିସା ମୁର୍‌ଚି ଜାଗିରୁଆ । ତମ୍ଭେ ମନ୍ ଡାଞ୍ଚକରି ରୁଆ, କାଇକେବଇଲେ ମାପୁରୁ ଆଇବା ଦିନ୍ ଲଗେ କେଟିଆଇଲାନି ।

^୯ ଏ ମର୍ ବାଇବଇନିମନ୍, ନିଜର୍ ନିଜର୍ ବିତ୍‌ରେ ଦସ୍ ଦାରାଦାରି ଉଆ ନାଇ । ସେନ୍ତିଆଲେ ମାପୁରୁ ତମ୍ଭେ ବିଚାର୍ ନ କରେ । ଦେକା ବଡ଼ ବିଚାର୍‌କାରିଆ ଲଗେ ଆତେ ।^{୧୦} ମର୍ ବାଇବଇନିମନ୍, ଜନ୍ ବବିସ୍‌ତ୍‌ବକ୍‌ତାମନ୍ ମାପୁରୁର୍ ନାଉଁ ଦାରି କାତାଦେଇ ରଇଲାଇ,

* ୫:୨ ୫:୨ ମାତିଉ ୬:୧୯

ସେମନ୍‌କେ ଏତାଆ । ଦୁକ୍‌କସ୍‌ଟ ଆଇଲାବେଲେ । ସେମନ୍ ମୁରତିକରି ରଇଲାଇ । ତମେମିସା ସେନ୍ତାରି ଅଇକରି ମନେ ଏତାଆ । ୧୧ ସେମନ୍ ମୁରତିକରି ରଇଲାର୍‌ପାଇ ବଲି କେଡେକରମର୍ ଲକ୍ ବଲି କଇଲୁନି । ସେନ୍ତାରିସେ ଆୟୁବ୍ ବେସି ଦିନ୍‌ଜାକ ମୁରତିକରି ରଇଲାଟା ତମେ ସୁନି ଆଚାସ୍ । ସାରାସାରି ପତେ ମାପୁରୁ ଜନ୍‌ରକାମ୍ ତାକେ ବାଉଡାଇଦେଲାଟା ଜାନିଆଚାସ୍ । କାଇକେ ବଇଲେ ଆମର୍ ମାପୁରୁ ଦୟାକରସି ଆରି ପୁରାପୁରୁନ୍ କଲିକରମ୍ ଦେକ୍‌ବା ମାପୁରୁ ।

୧୨ ☆ଏ ମର୍ ବାଇବଇନିମନ୍, ତମେ କାତା ଦେଲା ବେଲେ ରାନ୍ ନିୟମ୍ ପାକାଆ ନାଇ । ସରଗର୍ କି ଏ ଜଗତର୍ ନାଉଁ ଦାରିକରି କାଇ ବିସଇ ରାନ୍ ପାକାଆ ନାଇ । ତମର୍ ଅଇବା କାତାଆଲେ “ ଉଁ ” ଆରି, ନ ଅଇବା କାତା ଆଲେ “ ନାଇ ” ବଲିକୁଆ । ସେନ୍ତାରି ରଇଲେ, ତମେ ପର୍ମେସରର୍ ବିଚାରିନାଟାନେ ଡଣ୍ଡୁ ନ ପାଆସ୍ ।

୧୩ ତମର୍ ବିତ୍‌ରେ କେ ଜଦି ଦୁକ୍ ଜଞ୍ଜାଲେ ରଇଲେ, ସେ ପାର୍‌ତନା କର । କେ ଜଦି ସାର୍‌ଦାସଙ୍ ଆତେ ବଇଲେ, ସେ ପର୍ମେସରର୍ ତାକ୍‌ପୁଟାରି ଗିଡ଼ ଗାଅ । ୧୪ ☆କେ ଜଦି ଜର୍‌ଦୁକା ଅଇ ରଇଲେ ସେ ମଣ୍ଡୁଲିର୍ ପାର୍‌ତିନ୍‌ମନ୍‌କେ ଡାକାଆ, ସେମନ୍ ମାପୁରୁର୍ ନାଉଁଦାରି ଚିକନ୍ ରକଇ କରି ତାକେ ଲାଗାଇ, ପାର୍‌ତନା କରବାଇ । ୧୫ ବିସ୍‌ବାସ୍ ସଙ୍ ସରପୁଲା ପାର୍‌ତନା ଜରର୍ ଲକ୍‌କେ ନିମାନ୍ କରି ଉଟାଇସି । ଜଦିସେ ପାପ୍‌କରି ରଇସି ବଇଲେ ମାପୁରୁ ତାକେ କେମା କରସି । ନିଜର୍ ନିଜର୍ ଲଗେ ପାପ୍ କଲାଟା ଜାନାଆ ଆରି ନିଜର୍ ନିଜର୍ ପାଇ ପାର୍‌ତନା କରା । ସେନ୍ତାରି କଲେ, ତମେ ନିକ ଅଇସା । ୧୬ ଗଟେକ୍ ଦରମ୍ ଲକ୍ ପାର୍‌ତନା କଲାଟା ବେସି ବପୁ ରଇସି ଆରି ସେ ପାର୍‌ତନାର୍ ଉତର୍ ଦେକିଅଇସି । ୧୭ ଏଲିଅର୍ ବିସଇ ବାବିଦେକା, ସେ ମିସା ଆମର୍ ପାରାସେ ରଇଲା । ପୁରୁବେ ଇସ୍ରାଏଲ୍ ଦେସେ ପାନି ନ ମାର ବଲି ସେ ମନ୍‌ଦିଆନ୍ ଦେଇ ପାର୍‌ତନା କରତେରଇଲା । ସେଟାପାଇ ସେ ଦେସେ ତିନ୍ ବରସ୍ ଚ ମାସ୍ ଜାକ ପାନି ମାରେ ନାଇ । ୧୮ ଆରି ତରେକ୍ ପାନି ମାର ବଲି ପାର୍‌ତନା କଲାକେ ବାଦ୍‌ଲେଅନି ପାନି ମାରଲା । ତେବର୍‌ପାଇ ଜମିଟାନେ ତାସ୍ ଅଇଲା ।

☆ ୫:୧୨ ୫:୧୨ ମାଡିଉ ୫:୩୪-୩୭

☆ ୫:୧୪ ୫:୧୪ ମାର୍‌କ ୬:୧୩

୧୯ ଏ ମର ବାଇବଇନିମନ୍ ତମର ବିତ୍ତରେ ଜଦି କେ ସତ୍
 ବାଟ୍ ଚାଡ଼ିକରି ବିନ୍ ବିନ୍ ବାଟେ ଗାଲେ, ତାକେ କେ ଆଲେ ଜାଇ
 ବାଉଡାଇ ଆନ୍ଲେ, ^{୨୦} ☆ଏତାଇରୁଆଜେ, କେ ଜଦି, ଗଟେକ୍
 ପାପିକେ ବୁଲ୍‌ବାଟେଅନି ବାଉଡାଇ ଆନ୍ସି, ସେ ତାକେ ମରନେଅନି
 ରକିଆ କର୍ସି । ଆରି ସେ ଲକର୍ ଜବର୍ ପାପ୍ ରଇଲେ ମିସା ତାକେ
 କେମା ଅଇସି ।

ସତ୍ତ୍ୱର ବାବ୍
The New Testament in the Desiya language of India:
ସତ୍ତ୍ୱର ବାବ୍ (Bible)

copyright © 2020 The Word for the World International

Language: ଦେଶିଆ (Desiya)

Contributor: The Word for the World International

ସତ୍ତ୍ୱର ବାବ୍
ଦ୍ୱିତୀୟା ନିୟମ, 2020

The New Testament in Desiya Language

The Word for the World International

This translation is made available to you under the terms of the Creative Commons Attribution license 4.0.

You may share and redistribute this Bible translation or extracts from it in any format, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2023-04-08

PDF generated using Haiola and XeLaTeX on 21 Feb 2024 from source files dated 9 Apr 2023

cd4d7c1f-dc97-5fb4-a0ba-ab968fde9cde